

i2<sup>r</sup>

WJe Löblich vnd  
 vorfichtig aller Durchleüch=  
 tigfter Großmechtigter König/ Auch  
 mit was tugent vnnd gütten anfhlegen  
 in anfang das Römifch Reich von ge=  
 ringen vrfprüngen in groffe macht vnd  
 wesen kommen / durch welche vrfache  
 das gewachfen / vnnd widerumb zû  
 mehrmalen in abnemmen gefallen fey/  
 würt von dem aller Beredteften Ti=  
 to Lilio in feiner Rhômifchen Hiftorien (die er befchriben hatt) angezey=  
 get/ die billich alle Regenten (als einen Spiegel vnnd Exempel) anfehen/  
 darinn alles was zû mehrung des Reichs nutzlich vnd dienftlich feye / was  
 auch das felbige in abfall bracht vnd täglich bringen mag/ erfunden würt.  
 Dann keiner vnder allen denen / die Hiftorien befchriben / das Rhômifch  
 Reich alfo herrlich vnd prächtig/ wie Titus Liuius / gezieret hatt/ der auch  
 bey feinem leben/ nicht weniger lobs in den Rhômifchen gefchichten zûbe=  
 fchreiben/ dann die ftatt Rom in vberwindung der feind vnd jren Trium=  
 phen hat erlanget/ Auch Sanct Hieronymus in der vorred der Biblien  
 anzeyge gibt / da er fagt/ wie etliche edle Herren von Franckreich vnnd Hi=  
 fpanien zû Tito Liuiio/ als zû einem Bach oder fluß/ der von füffen vnd lieb=  
 lichen reden(als mit Milch flüffe) kommen feyen/ vnnd die jhenen/ die die  
 ftatt Rom in allem jrem wesen vnd vermögen/ nicht bewegen mocht / da=  
 hin zûkommen/ vnd fie zûbefichtigen/ hat das gerücht vnnd lob difes eyni=  
 gen Titi Liuij dahin bracht/ das fie jhnen allein fehen vnnd hören wolten.  
 Dann Liuius vor allen andern / die von der Römer vnnd anderer Natio=  
 nen gefchichten vnd kriegten gefchriben haben/ den fürzug (vnd als Hercu=  
 les) vnder allen ftarcken den platz behaltet / als der jhene der im lefen nicht  
 verdroffen / fonder lieblich vnd frölich / auch im außfprechen dapffer vnnd  
 großmütig würt erfunden. Keiner ift vnder allen den jhenen/ die Hiftori=  
 en je befchriben haben / der die ohren der menfchen mit feinen reden vnnd  
 Oration (die allenthalben in difem Büch eingeflochten feind) vollkorñli=  
 cher möge erfüllen/ keiner der das hertz vnnd gemüt der menfchen mehr  
 durchdringen / vnnd leichtlicher zû freude / zorn vnnd mitleiden bewegen  
 mag/ dann Liuius/ deßhalben er wol billich allen anderen in Hiftorien für=  
 gefetzt/ vnd für den beften vnnd nützlichften gehalten würt. Damit aber  
 folche Hiftoria auß dem Latein ins Teütfch verändert / an den tag käme /  
 vn̄ offenbart würde/ ift mein begird lange zeit gewefen/ die felbige eüwerer  
 Königlichen Mayeftat (als einem oberften haupt vnd regierer des heyli=  
 gen Rhômifchen Reichs) zûzûfchreiben / wie dann hieuoer dergleichen Va=  
 lerius Maximus feine Hiftorien / von mercklichen gefchichten vnd fprü=  
 chen/ dem Keyfer Tiberio/ vnnd Plinius fein werck von der natürlichen  
 ij Hiftorien

i2<sup>v</sup>

---

Hiftorien Tito Velpafiano zûgefchriben vnnd gefchickt haben. Sollich werck aller mechtigter Kônig (das zûuoran eüwer Kôniglichen Mayestat zû ehren / darzû Fürften vnd Herren / auch Gemeynden vnnd Stetten Teütfcher nation / zû nutze ins teüfch bracht / vnd in der löblichen Statt Meyntz gefertigt vnd getruckt ift) wöll eüwer R. May. gnädiglich auffnemmen. In welcher ftatt auch anfäncklich die wunderbarliche Kunft der Truckerey / vnnd im erften von dem kunftreichen Johann Guttenberg / da man zalt nach Chriffti vnfers Herren geburt / taufent vierhundert vñ fünff tzig jar / erfunden / Vnnd darnach mit fleiß / koft vnd arbeyt Johann Fauften vnd Peter Schöffers zû Meyntz ins werck gebracht / vnd beftändig gemacht ift wordē. Darumb die felbe ftatt nit allein bey Teütfcher Nation / fonder auch bey aller welt in ewige zeyt (als wol verdienet) gepreißt vnd gelobt foll werden / vnd die Burger vnd einwoner dafelbft des billich genieffen.